

Guardia Zibilak grapokide bat bahitzea ez da terrorismoa Entzutegi Nazionalarentzat

Jesus Celaren bahiketaren auzia Coruñaeko epaitegi batean utzi beharko du Garzonek

Entzutegi Nazionaleko Penal arloak Coruñaeko epaitegi arrunt baten esku utzi du Jesus Cela Seoane GRAPOko preso ohiak 1990ean jasandako bahiketaren sumarioa. Orain arte Baltasar Garzon epaileak atxiki dio ikerketari, baina Entzutegi Nazionalak kendu egin dio, ustezko bahitzaileek, guardia zibilak izanik, ez zutelako talde armatu bat osatzen eta, hortaz, ez zutelako terrorismoa egin.


Erredakzioa / Donostia

JESUS CELA 1990ko urtarrilaren amaieran bahitu zuten Coruña. Egun gutxi batzuk lehenago geratua zen aske, GRAPOko kide izateagatik bete beharreko zigorra bete ondoren. Cela oso ahul zegoen, hilabete ugari egin zituelako bere taldekideekin batera gose greban.

Cela ordu batzuz atxiki zuten guardia zibilek, baina gero aske utzi zuten, atera nahi zioten informaziorik ez zuelako.

Bahiketa honetan inpartatuta daude Jose Lujs Corcuera Espainiako Barne ministro ohiak, Rafael Vera Segurtasunerako Estatu idazkari izandakoa, Pedro Gomez Nieto Guardia Zibileko tenientea eta lau guardia zibil. Halaber akusatuta dago Luis Roldan ere, baina besteek ez bezala, Guardia Zibileko zuzendariak ez du gertatutakoa ukatzen. Roldanek Garzoni esan zionez, Guardia Zibileko Omega talde bereziak bahitu zuten Cela, Corcuera, Verak eta berak aginduta.

Roldanek ziurtatu zuen «terrorismoaren aurkako gerra zikina-



Jesus Cela Seoane GRAPOko kidea, libre geratu eta gose greba utzi zuenean, 1990eko urtarrilaren 23an. LAVANDEIRA / EFE

ren atala» zela Celaren bahiketa, eta aurretik beste hiru ekintza egin zirela aitortu zuen. Betiere Roldanen arabera, 1989ko irailean, Corcuera eta Verak aginduta gutun-bomba bana igorri zitzaizkien HBko hiru kideri. Lehengoak eztanda egin zuen eta Errenteriako (Gipuzkoa) postaria hil zuen.

«Ekintza isolatua izan zen» • Fiskalaren eta defentsen oposizioarekin, Garzonek sumarioari eutsi

zion, Omega taldea eta haien agintariak «talde terroristatzat» baitzituen. Entzutegi Nazionalak, ordea, azpimarratu du Celaren bahiketa «ekintza isolatua» izan zela eta, hortaz, ezin dakiokela talde armatu antolatuta bati leporatu.

«Omega taldea antolatuta» zegoen, baina ezin da esan talde horrek legez kanpoko ekintzak egin ohi zituela», dio atzo jakinarazitako autoak. Entzutegi Nazionalak iritzi dio talde bati erakun-

de armatu deitzeko, «egonkortasuna» erakutsi behar duela eta ordena politikoa iraultzeko gogoa frogatu behar duela.

Entzutegi Nazionalak atzera bota ditu aferaren artxibatzea eskatzen zuten errekursoak, zer ikertu badagoela iritzi diolako. Ikerketa Coruñaeko bigarren inspekzio epaitegiaren esku geratu da, GRAPOko preso ohiak hor salatu baitzuen bere bahiketa.

Erabaki honen aurkako errekurtsorik ezin da aurkeztu. X

Hegaztien ehizaldia luzatzea jarrera «arbuigarri, lotsagarri eta okaztagarritzat» jo du Noël Mamèrek

■ Botoemaile gutxirekin baina eskuin eta ezkerreko diputatuen bat-egiteaz onartu zen UDFren legea

Allande Sokarros / Baiona

ATZO goizean zuen, azkenean, Frantziako Legebiltzarrak gehiengo onartu zuen uretako hegazti eta xori migratzaile batzuen ehizatzearen denboraldia hilaurretan aurreratzen duen legea. Parte hartze txikia izan zen, haatik, 115 diputatuk baitzuten boza eman eta 112 boto baitziren baliozko izan (Frantziako Legebiltzarrean 577 diputatu daude).

Hala ere, atzoko bozkaldi hori aipagarria geratuko da bi arrazoiengatik: bata da Europako batzordeak finkatutako arau bati zaput egiten diola eta bestea, berriz, eskuin eta ezkerreko diputatuek bat egin dutela ehizatarien alde. Hala, UDFk aurkez-

tutako lege proposamen hau RPR, UDF, DL, PS, PCF, MDC eta PRG alderdietako 92 diputatuk onartu zuten eta 20 boto azaldu ziren honen kontra. Azken zifra horri dagokionez, ohargarria da lege proposamen honen aurka gogor azaldu diren sei diputatu ekologistek gain jarrera honen aldeko besterik ere izan dela.

Legegaiaren eztabaida denboran azaldu zuen salaketa gogorri eutsita, Noël Mamère Gironako diputatu ekologistak hitz bortitzak aditza eman zituen diputatu sozialista eta komunisten aurka, haien jarrera «arbuigarria, lotsagarria eta okaztagarria» izan dela aldarrikatuz. Hitz leunagoz baina Dominique Voynet Ingurugiro ministro ekologis-

tak ere gaitzetsi zuen lege proposamena, haren ustez «ez baitu inola ere hobetuko hegazti migratzaileen kudeaketa eta, are gehiago, korapilatsuagoa bihurtuko baitu». Voynetek jarrera sustatzen zuela jakiterat eman zuen Gobernuak, baina ez zuen hargatik ezer egin diputatu sozialista gehienek eginmoidea aldarazteko. Gauzak horrela, «Pontzio Pilato gisa jokatu» izana, hots itxurakeriaz ekitea egotzi zion Gobernuari Noël Mamèrek.

Voynek Gobernuaren geratuko da • Gertakari honek tentsioak nabarmen handitu ditu ezker askotariko partaideen artean. Hala eta guztiz ere, bere ministro kargutik dimititzeko asmorik ez

duela ziurtatu zuen Voynetek. Ingurugiro ministroaren iritzian, «epe luzerat ari gara lanean; auzi hau berriro ere aipagai izango da eta aldi hartan ez zaio saihestu ahal izan inkaninaz jokatzeko». Izan ere, hegazti migratzaileen ehizketa denbora, lege honen bidez, uztailaren 14aren osteko lehen larunbataren eta hurrengo urteko otsailaren 28aren bitartean zilegi eginda, Frantziako Legebiltzarra Europako Parlamentuak 1979. urtean ebatzitako arau baten aurka jarri da.

Gauzak horrela, pentsa daiteke Europako Batasuneko beste herri batzuek salaketa bat eginen dutela eta Frantziaren jokaera auzian jarriko dutela. X

laburrean

■ Marquesen eta haren kontseilarien militantzia eten du PPK

SERGIO MARQUES Asturiasko presidentea eta haren gobernu kontseilari guztiak behin-behineko alderditik kanpo utzi ditu PPK, alderdiko zuzendaritzaren agindua ez betetzeagatik. Espedienteen amaieran, ziur aski bota egingo dituzte PPKtik. Marquesek ez du dimititu nahi eta legegintzaldia amaitu arte —1999ko maiatz— karguan jarraituko duela esan du. Zaila izango du ezin lege aurrera ateratzeko. Bost diputaturen sustengua besterik ez du. PPK 16 ditu, IUk 17, IUk, PASEk bat eta IUko transfuga bat dago. X

■ Europako Legebiltzarrak berriz egin du Espainiaren alde olioaren gaian

EUROPAKO LEGEBILTZARRAK oliba olioaren merkaturaren erreforma onartu zuen atzo aldeko 135 botorekin eta aurkako botorik gabe. Legebiltzarrak onartu duen erforman sartzen dira eurodiputatu espainiarrek egin dituzten moldaketak. Datorren astean Luxenburgon bilduko diren Nekazaritza ministroek dute azken hitza gaiari buruz. Ekoizleak ez dira, ordea, oso baikor. X

■ Manuel Fragaren ondorengotza ez da aipatuko Galiziako PPren kongresuan

ATZO hasi eta gaur bukatuko sa Santiagon Galiziako PPren bederatzigarren kongresua. Hasieran, Manuel Fragaren hurrengoa nor izango zen erabakitzeko borroka izango zela uste bazen ere, azkenean 75 urteko Xuntako presidentek bere nagusigoa erakutsi eta gaia beste baterako utzi du. Batzarrarekin, Fragak bultzada eman nahi dio PPri, azken urteetako emaitza onak asko indartu baitute haren etsai nagusia, BNG talde nazionalista. X

■ PSCK ez du zigorrik nahi zinemaren dekretuan

NARCIS SERRA Kataluniako Sozialisten Alderdiko (PSC) lehen idazkariak arbuia egin zuen atzo Generalitateak katalanezko filmak bultzatzeko prestatu duen dekretua. Serrak exijitu dio dekretua beraiekin negoziatzea, dekretuaren oinarri den Katalanaren Legearekin egin zuten bezala. Halaber, baztertu egin du katalanezko kuotak betetzen ez dituzten filme banatzaile eta erakusleei zigorrak ezartzea. «Filmak katalanez bikoiztera behartu beharrean, hala egiteko akuilatu behar da», esan zuen. X